

Siunnersuut uunga: Pisortanit ikiorsiissutit pillugit Inatsisartut inatsisaannik aamma suliffissarsiortunut ikiorsiissutit pillugit Inatsisartut inatsisaannik allanngueq pillugu Inatsisartut inatsisaat

(Isumaginninnermut, Suliffeqarnermut Nunamullu Namminermut Naalakkersuisoq)

Saqqummiussissut

(Isumaginninnermut, Suliffeqarnermut Nunamullu Namminermut Naalakkersuisoq)

Siullermeerinnineq

Naalakkersuisut matumuuna saqqummiuppaat pisortanit ikiorsiissutit pillugit Inatsisartut inatsisaannik aamma suliffissarsiortunut ikiorsiissutit pillugit Inatsisartut inatsisaannik allanngueq pillugu Inatsisartut inatsisaat pillugu siunnersuut.

Inatsisartut 2022-mi upernaakkut ataatsimiinnermi suliffissarsiortunut ikiorsiissutit pillugit Inatsisartut inatsisaat aamma pisortanit ikiorsiissutit pillugit Inatsisartut inatsisaat akuersissutigaa. Inatsisartut inatsisaat marluk ulloq 1. januar 2023-mi atuutilertussaapput.

Inatsisit marluk Inatsisartunut saqqummiunneqarnissaat sioqqullugu inatsisiliorneq sivisooq sukumiisorlu ingerlanneqarpoq, tassani ilaatigut kommuninik ingerlaavartumik oqaloqatigiinnerit ilanngunneqarlutik.

Ingerlanermut tassunga atatillugu siunnersuutit tamanut tusarniaassutigineqarput, illuatungiliuttullu kalluarneqartut soqutiginnittullu tamarmik oqaaseqarnissamut periarfissinneqarlutik aamma siunnersuuteqarlutik, tamannalu Naalakkersuisut annertuumik isumaqartutut isigivaat.

Naalakkersuisut aamma kommunit tallimat akornanni ataatsimut tapiissutit pillugit isumaqatigiinniarnit naammasseqqammersunut atatillugu atuutilerfissatut ulluliussat akuersissutigineqartut naleqquttuunersut pillugit borgmesterit ernumassuteqarlutik oqaaseqarput.

Tamatumunnga atatillugu borgmesterit naatsorsuutigalugu oqaatigaat, IT pillugu aaqiissutit pisariaqartut piffissaq eqqorlugu naammassineqarsinnaanngitsut, tamatumunnga suliaq naatsorsuutigisamit pisariunerummat.

Tamanna tunngavigalugu aamma Naalakkersuisut kommunillu tallimat akornanni politikikkut misissuinerit kingorna isumaqatigiissutigineqarpoq, pisortanit ikiorsiissutit pillugit Inatsisartut inatsisaata aamma suliffissarsiortunut ikiorsiissutit pillugit Inatsisartut inatsisaata atuutilersinneqarnissaannut ullui qaammatinik arfinilinnik kinguartinneqarnissaat pillugu Naalakkersuisut qinnutigissagaat, taamaasillutik Inatsisartut inatsisaat aatsaat ulloq 1. juli 2023-mi atuutilersinneqarlutik. Meeqqanut tapit pillugit inatsisissaq nutaaq upernaakkut 2023-mi saqqummiunneqassaaq, pisortanit ikiorsiissutit pillugit inatsisartut inatsisaat aammalu suliffissarsiortunut ikiorsiissutit pillugit Inatsisartut inatsisaata atuutisilersinneqarnissaannut malitsillugit.

Borgmesterit tallimat kissaataat Naalakkersuisut malikkumavaat, taamaattumillu siunnersuut manna Naalakkersuisut suliaaraat siunnersuullu kingusinaartumik nalunaarutigineqarnissaa

aamma 2023-mut aningaasaqarnermut inatsisissap pingajussaaneerlugu naammassillugu suliarineqannginnerani siunnersuut pillugu Inatsisartut Siulittaasoqarfiat immikkut akuersissuteqarnissaanik qinnuteqarfigalugu.

Taamatut oqaaseqarlunga immikkoortoq Inatsisartunut suliassanngortippara.